

13.Maj 2019.

UPA2019/118

Qanoq iliorluni nunatsinni inoqarfiit inuerukkiartortut, inuerukiartornerisa illuanut saatsinnissaa pillugu apeqquteqaat aallaavingalugu Inatsisartunut oqallisissiaq.

(Inatsisartuni Siumut gruppiani ilaasortat)

Nunatsinni najunaqariaaserput piniarneq tunngavingalugu nunassiertorneq pisimammat siamasissorujussuarmik najungaqarnerput apeqquersorneqarsinnaangilaq, nunaqarfiillu ilarpassui inueruttarsimapput kiisalu aamma illoqarfimmik inueruttoqarnikuusoq puorneqanngisaannartussaavoq.

Sumiiffiit ilai periarfissarissaarnerupput kiisalu sukkanerujussuarmik ineriartorfiupput, aamma akileraartarnikkut pittaanerumik atungassaqarfiupput. Tupinnartuunngilarlu periarfissarissaartunut nutsertoqassangaluarpat, tassami qangarsuaaniilli inuuniarneq taamaassimavoq.

Nunatsinni naalackersuinikkut siunnerfiit pingaartitat naleqartitallu pimoorunneqarnissaat pingaarutilerujussuurtut Siumumiik isingaavut minnerunngitsumillu najukkani naleqqussaajuarnissaq pingaartorujussuurtut aamma isingalutigu. Taamaangippammi inuit imminnut najussallugu tulluarnerusorisaminnut nutsertuartaapput.

Nunaqarfiit pineqarpata tunitsiviit uummataapput, tunitsiveqarnikkullu innarliisoqaraangat nunaqqatigiinnut innarleerujussuarnermik kinguneqartarpoq, taakkutuaasarmatami annertunerpaamik suliffissaqartsitsillutillu aningaasarsiornissamat toqqammavissiisartut. Tunisassianillu toqqorsiveqarneq ukiukkut imaatigut tikiqqarsinnaajunnaartarneq eqqarsaatigalugu kinguarsaanani aaqqiisoqarnissaa najungaqartunut isumalerujussuuvoq.

Inuiaat allat inuuffigisinnaasimangisaat siulitta imminnut upperilluinnarlutik najortuarsimasaat kingornunnikuuarput, sulilu aamma kinguaatta kingornuttussaavaat, taamaattumik nunarput tamaat ataatsimut isingalugu siuarsaaviginngikkutsigu periarfissarinnernut nutserneq ingerlaavassooq. Periarfissarissaartorpasuupput annertunngitsumik inerisaasoqarpat.

Isorliunerusut sukkanerumik inerisaavingineqartariaqarput najungaqartut peqatigeqqissaarlugit, nalunngilarpummi inoqartoq atungarlionaluarunilluunniit imaaliinnarlutik najukkaminik qimatsiunngitsunik. Inuiaqativut piumassusilippasuupput aqutissiuunneqarunillu sapinngilluinnarput, taamaattumik puorneqartut misigitinnagit inuussutissarsiorfigisinnaasaannik annertoorsuunngitsumik ikiorserneqarunik nunatsinni



inuussutissarsiornikkut kivitseqataassaqaarput, assaammi sulisinnaasut tamaasa pisariaqartippavut.

Uanilu aamma oqallisissiami Siumumiik eqqaanngittoorusunngilavut Nunatta Kangiani nunaqartut immikkut isigineqarlutik piaartumik inuussutissarsiornikkut inerisaavingineqarnissaat, sineriarujussuarmik isorartoqisumik inuit ikittunnguit najungaarput. Qularnanngilaq aalisangarpassuaqartoq qularnanngilluinnarporlu piniagarpassuaqartoq, taamaattumik tassani inerisaarusuttut aporfilersornagit tapersersorneqartussaapput tapersersorneqartuassallutillu. Pingaaruteqarporlu aamma pulitikkikkut qineqqusaarutiginagit sumi parteeqarneq apeqqutaatinnagu piaartumik aaqqiissutissanik tikkuussisoqartariaqarpoq.

Nikkulaat Jeremiassen, Siumut